

VENDIM

Nr. 329, datë 16.5.2012

PËR KRITERET DHE PROCEDURAT E DHËNIES SË NDIHMËS SHTETËRORE FINANCIARE PËR MBULIMIN E DËMEVE TË SHKAKTUARA NGA FATKEQËSI NATYRORE OSE FATKEQËSI TË TJERA TË SHKAKTUARA NGA VEPRIMTARIA NJERËZORE

Në mbështetje të nenit 100 të Kushtetutës, të neneve 5/ 2/"dh", dhe 8 të ligjit nr. 8756, datë 26.3.2001 "Për emergjencat civile", të ndryshuar, me propozimin e Ministrit të Brendshëm, Këshilli i Ministrave

VENDOSI:

I. Të përgjithshme

1. Shteti ndihmon financiarisht të dëmtuarit, në rastet kur, si rezultat i fatkeqësisë natyrore ose fatkeqësive të tjera të shkaktuara nga veprimtaria njerëzore, kanë pësuar dëme në njerëz dhe dëme materiale, në kushtet kur për përballimin e situatës:

a) është shpallur gjendja e emergjencave civile;

b) nuk është shpallur gjendja e emergjencave civile. II. Procedurat në rastet e shpalljes së gjendjes së emergjencave civile Në rastin e shpalljes së gjendjes së emergjencave civile, fatkeqësi natyrore, ndiqen këto procedura:

1. Evidentimi i subjekteve dhe dëmeve

a) Evidentimi i subjekteve të dëmtuara nga fatkeqësi natyrore ose fatkeqësi të tjera të shkaktuara nga veprimtaria njerëzore bëhet nga grupi i konstatimit, i cili ngrihet me urdhër të kryetarit të njësisë së qeverisjes vendore të dëmtuar.

b) Ngritja e grupeve për vlerësimin e dëmeve të shkaktuara nga fatkeqësitë natyrore ose fatkeqësi të tjera të shkaktuara nga veprimtaria njerëzore bëhet me vendim të Këshillit të Ministrave, ku përcaktohen edhe formularët përkatës. Grupet e vlerësimit të dëmeve drejtohen nga përfaqësues të këshillit të qarkut përkatës.

c) Përbërja e grupeve të vlerësimit të dëmeve përcaktohet nga natyra e fatkeqësisë, nevoja për vlerësim dhe karakteri i dëmeve.

ç) Vlerësimi i dëmeve për subjektet e evidentuara nga grupi i konstatimit të njësisë së qeverisjes vendore, sipas rastit, mund të përfshijë dëmet në **struktura private banimi**, në orendi dhe pajisje, në infrastrukturë, në biznese, në kultura bujqësore e blegtorale, mjete mekanike, makineri dhe agregate bujqësore, si dhe në objekte social-kulturore.

2. Procedurat e vlerësimit të dëmeve, vlerësimit financiar dhe miratimit të dëmshpërblimit

a) Grupet e vlerësimit të dëmeve bëjnë vlerësimin në secilin objekt të përmendur në shkronjën "a" të pikës 1 të këtij kreu, dhe plotësojnë formularët përkatës me sasi të dhe efektet financiare, të cilat i dorëzojnë në këshillin e qarkut përkatës.

b) Këshilli i qarkut, në bashkëpunim me njësitë e qeverisjes vendore, përgatit listat përmbledhëse për subjektet private të pronave të dëmtuara, preventivat që miratohen nga ministrinë e linjës për sektorët që ato mbulojnë, si dhe plotëson dokumentacionin me certifikatën familjare, fotokopjen e dokumentit të identifikimit dhe i paraqet ato në Drejtorinë e Përgjithshme të Emergjencave Civile (DPEC), në Ministrinë e Brendshme.

c) Kur ka raste të humbjes së jetës, kërkohet dhe certifikata e vdekjes së pjesëtarit të familjes, shoqëruar me vërtetimin e komisionit mjeko-ligjor, sipas rastit.

ç) Vlerësimi financiar i dëmeve për strukturat e **banimit**, objektet e biznesit, strukturat me karakter bujqësor e blegtoral etj. bëhet:

- në rastet e shkatërrimit në total të tyre, sipas kostos mesatare të ndërtimit të banesave nga Enti Kombëtar i Banesave, për vitin përkatës;

- në **rastet e tjera, me çmimet në fuqi, sipas zërave të punimeve të ndërtimit**, miratuar nga Këshilli i Ministrave për Entin Kombëtar të Banesave për qytetin përkatës, të cilat i dërgohen me shkresë zyrtare këshillit të qarkut.

d) Vlerësimi i dëmeve të shkaktuara në objekte sociale e publike (shkolla, spitale, qendra shëndetësore, kabina të tensionit të lartë, ujësjellës dhe kanalizimet e ujërave të zeza dhe impiantet e trajtimit për ujin e pijshëm apo të ndotur, hidrovore, argjinatura, rrugë etj.), kryhet nga grupet e vlerësimit, në përbërje të të cilëve ka ekspertë të institucioneve që kanë në pronësi apo në administrim këto objekte. Për këtë qëllim hartohen planimetritë dhe preventivat përkatës, të cilat dërgohen në DPEC, në Ministrinë e Brendshme.

dh) Vlerësimi i dëmeve të shkaktuara në kultura bujqësore, mjete mekanike, makineri dhe agregate bujqësore, në gjënë e gjallë dhe në bazën ushqimore (koncentrate, sanë, njomishte etj.) kryhet sipas çmimeve të tregut, të miratuar nga Ministria e Bujqësisë, Ushqimit dhe Mbrojtjes së Konsumatorit, dërguar me shkresë zyrtare në këshillin e qarkut.

e) Vlerësimi për orenditë, mobiliet dhe pajisjet elektroshtëpiake të dëmtuara në objektet e banimit bëhet mbi bazën e çmimeve aktuale mesatare, të përcaktuar nga Drejtoria e Përgjithshme e Tatimeve, dërguar me shkresë zyrtare këshillit të qarkut përkatës.

ë) Vlerësimi i dëmeve në makineri, mallra dhe pajisje, të dëmtuara në objektet e biznesit, kryhet në përputhje me dokumentacionin e depozituar pranë organeve tatimore e doganore dhe vlerësimi bëhet nga drejtoritë përkatëse rajonale të tatimeve.

f) Ministria e Brendshme paraqet projektvendimin për miratim në Këshillin e Ministrave, me vlerën e dëmeve të shkaktuar nga fatkeqësia në objektet pronë private, së bashku me listën emërore të përfituesve, si dhe vlerën e dëmeve të shkaktuara në objektet sociale e publike, të përmendura në shkronjat "ç", "d" e "dh".

III. Procedura në rastet kur nuk shpallet gjendja e emergjencës civile

Në rastin kur nuk është shpallur gjendja e emergjencës civile, fatkeqësisë natyrore, ndiqen këto procedura:

1. Procedurat e vlerësimit të dëmeve

a) Familjet që kanë pësuar dëme, shkaktuar nga fatkeqësi të ndryshme natyrore ose fatkeqësi të shkaktuara nga veprimtaria njerëzore, paraqesin kërkesën e tyre për ndihmë financiare pranë organit të qeverisjes vendore përkatëse.

b) Drejtuesi i organit të qeverisjes vendore verifikon vërtetësinë e fakteve të paraqitura në kërkesë, nëpërmjet komisionit të ngritur me urdhër të tij, i cili mban dhe procesverbalin e konstatimit të gjendjes për dëmet e shkaktuara.

c) Afati kohor nga ngritja e komisionit deri në përfundimin e hartimit të procesverbalit është 5 (pesë) ditë.

ç) Sipas rastit, me kërkesë të kryetarit të njësisë së qeverisjes vendore përkatëse, këshilli i qarkut përkatës krijon komisionin e ekspertëve për vlerësimin e dëmeve të shkaktuara në objektet e banimit, i cili pas vlerësimit të dëmeve sipas përcaktimeve të bëra në shkronjën "ç" të pikës 2 të kreut II të këtij vendimi, përcakton masën e dëmshpërblimit për familjet e dëmtuara.

d) Vlerësimi për orenditë, mobiliet dhe pajisjet elektroshtëpiake të dëmtuara në objektet e banimit, bëhet në përputhje me shkronjën "e" të pikës 2 të kreut II të këtij vendimi.

dh) Afati kohor nga ngritja e komisionit deri në përfundimin e vlerësimit të dëmeve të jetë 15 (pesëmbëdhjetë) ditë.

e) Bashkia ose komuna harton kërkesën për dhënien e ndihmës së menjëhershme, për sigurimin e jetës dhe kushteve të përkohshme për jetesë të qytetarëve, si dhe për shpenzime të tjera për përbalimin e situatës emergjente.

ë) Këshilli i komunës ose i bashkisë, pas shqyrtimit të procesverbalit të konstatimit të gjendjes dhe të dokumentacionit të vlerësimit të dëmeve, merr vendimin për dhënien e ndihmës financiare, në të cilin përmendet dhe masa e ndihmës së dhënë nga ky organ.

f) Institucioni i prefektit të qarkut konfirmon bazueshmërinë ligjore të vendimit të lëshuar nga këshilli i komunës ose i bashkisë.

2. Dokumentacioni i nevojshëm për të kërkuar dhe vërtetuar dhënien e ndihmës financiare:

a) Procesverbali i konstatimit të gjendjes;

b) Vendimi i këshillit të komunës ose i bashkisë;

c) Preventivat e dëmeve nga ana ndërtimore në objektet e banimit, si dhe dëmeve në orendi, mobilie dhe pajisje elektroshtëpiake;

ç) Certifikata familjare në momentin e ndodhjes së fatkeqësisë;

d) Certifikata e vdekjes së pjesëtarit të familjes, kur ka raste të tilla, shoqëruar me vërtetimin e komisionit mjeko-ligjor, sipas rastit;

dh) Akt-ekspertiza nga PMNZSH-ja, në raste zjarri dhe vërtetimi nga Policia e Shtetit ose prokuroria e rrethit, në rast eksplozivi;

e) Studimi gjeologjik i hartuar nga Shërbimi Gjeologjik Shqiptar ose subjekte të licencuara, nëse është rrëshqitje toke;

ë) Konfirmimi i vendimit të njësisë së qeverisjes vendore për bazueshmërinë ligjore nga ana e institucionit të prefektit të qarkut;

f) Shkresa nga njësitë e qeverisjes vendore dhe këshilli i qarkut, ku të shprehet masa e ndihmës së dhënë për familjen e dëmtuar, në rast se ka, ose pamundësia financiare për ta ndihmuar, për mungesë fondesh.

3. Përcaktimi i ndihmës financiare

a) Masa e ndihmës financiare që Këshilli i Ministrave ose Ministria e Brendshme akordon në rastin e humbjes së jetës së anëtarëve të familjes, si pasojë e fatkeqësisë, është 500 000 (pesëqind mijë) lekë për çdo person të vdekur.

b) Në rastet e dëmtimit të banesave private, masa e ndihmës bazohet në preventivin e bërë nga grupet e vlerësimit, llogaritur me çmimet në fuqi, miratuar nga Këshilli i Ministrave për Entin Kombëtar të Banësive dhe në mundësitë financiare të organeve të qeverisjes vendore, Ministrisë së Brendshme ose fondit rezervë të buxhetit të shtetit apo dhe të burimeve të tjera.

c) Masa e ndihmës financiare për dëmtime masive për banesa private të dëmtuara nga fatkeqësitë natyrore ose të llojeve të tjera të banësive, jepet nga Këshilli i Ministrave, me propozim të Ministrit të Brendshëm dhe njësisë të qeverisjes vendore, sipas normave të strehimit në fuqi.

ç) Masa e ndihmës financiare për dëmtime individuale ose në grupe të vogla të banësive jepet nga Ministria e Brendshme ose njësitë e qeverisjes vendore, nëpërmjet fondit të miratuar në buxhetin e vitit në programin "Emergjencat civile". Ajo do të llogaritet në të njëjtën mënyrë siç përcaktohet në shkronjat "b" dhe "c" të kësaj pike dhe do të jetë 50% e vlerës së llogaritur. Për rastet kur vlera e tregut të lirë të banësive është më e ulët se vlera e banesës e llogaritur mbi bazën e kostos së ndërtimit të banësive sipas EKB-së, merret për bazë vlera e tregut të lirë të rrethit/qytetit përkatës. Bën përjashtim rasti kur sipërfaqja e banimit të banesës së vjetër është mbi normativat e strehimit sipas shkronjës "b" të kësaj pike. Në këtë rast, sipërfaqja e banesës së re dhe e vlerës së ndihmës financiare do të llogaritet sipas normave të strehimit në fuqi.

d) Në rastin e dëmtimeve në orendi, mobilie dhe pajisje elektroshtëpiake në strukturat e banimit, masa e ndihmës llogaritet mbi bazën e çmimeve mesatare për artikuj, përcaktuar nga strukturat e tatim-taksave.

dh) Kur studimi i kryer nga Shërbimi Gjeologjik Shqiptar rekomandon ndërtimin e banesës së re në një vend tjetër, akordimi i fondeve jepet pas miratimit të lejes së ndërtimit, sipas akteve ligjore e nënligjore në fuqi.

e) Dosjet me dokumentacionin përkatës të familjeve të dëmtuara, për të cilat nga ana e njësive të qeverisjes vendore nuk është akorduar ndihma e nevojshme, sipas kritereve të këtij vendimi, dërgohen pranë DPEC-së, në Ministrinë e Brendshme, me shkresë përcjellëse të konfirmuar nga institucioni I prefektit të qarkut.

ë) Bazuar në dokumentacionin e dërguar, vlerësuar e argumentuar nga DPEC-ja, Ministria e Brendshme akordon fonde nga buxheti i saj, të miratuara në programin "Emergjencat civile", ose i propozon Këshillit të Ministrave dhënien e ndihmës banorëve të dëmtuar, nga fondi rezervë i Këshillit të Ministrave.

f) Fondet për dhënien e ndihmës akordohen nga buxheti i njësive të qeverisjes vendore, nga programi "Emergjencat civile" në Ministrinë e Brendshme, nga burime të tjera e donacione, si dhe nga fondi rezervë i Këshillit të Ministrave.

g) Fondet e akorduara nga Këshilli i Ministrave dhe Ministria e Brendshme u shpërndahen shtetasve, nëpërmjet njësive të qeverisjes vendore, ku ata kanë vendbanimin.

gj) Në rastet e dëmtimeve në objektet sociale e publike, fondet e akorduara nga Këshilli i Ministrave dhe Ministria e Brendshme u kalojnë njësive të qeverisjes vendore, bashki, komuna dhe këshillit të qarkut.

h) Fondet e akorduara nga Këshilli i Ministrave dhe Ministria e Brendshme në rastet kur përdoren për riaftësimin e infrastrukturës kritike në territorin e njësive të qeverisjes vendore, si: ura, prita malore, rrugë, diga, argjinatura, ujësjellës dhe kanalizimet e ujërave të zeza dhe impiantet e trajtimit për ujin e pijshëm apo të ndotur etj., me arsye të motivuara përjashtohen nga procedurat normale të prokurimit, referuar nenit 5/2/c, të ligjit nr. 9643, datë 20.11.2006 "Për prokurimin publik", të ndryshuar.

IV. Të fundit

1. Për zbatimin e këtij vendimi, Ministri i Brendshëm dhe Ministri i Financave nxjerrin udhëzim të përbashkët.

2. Vendimi i Këshillit të Ministrave nr. 206, datë 26.3.1998 "Për kriteret për pjesëmarrjen e shtetit në përballimin e dëmeve në raste fatkeqësish", i ndryshuar, shfuqizohet.

3. Ngarkohen Ministria e Brendshme dhe Ministria e Financave për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha